

Caminda di Cruz Bibo un biaha mas ta hala hopi atencion

ORANJESTAD - Bierna Santo, Misa Fatima na Dakota y e bario di Dakota un bes mas tabata escenario di e Caminda di Cruz Bibo cu a haci su recorido den e bario di Dakota pa despues termina dilanti Misa Fatima. Ya for di tempran fiel sigui donan a busca e luga perfecto pa asina no perde nada di e Caminda di Cruz Bibo mientras otronan a bini specialmente pa cana den e Caminda di Cruz Bibo aki. Mester bisa cu esnan cu a interpreta e diferente papelnan den e caminda di cruz ya for di dos siman prome tabata entrena tur dia bou guia di Sra. Gina Nuboer. Notabel ta cu mas di 120 persona a forma parti di e elenco e mainta aki. E diferente escenanan a pone e emocion di esnan presente yena, mientras na final e canto di e hoben Steve Geerman, kende a interpreta "Grandi Bo Ta" a pone algun lagrimanan bin afo. Pabien na e organisadonan di e Caminda di Cruz Bibo, nos ta spera cu pa e proximo aña cu Dios su poder nos lo por disfruta un bes mas di e Caminda di Cruz Bibo. Riba e fotonan algun momento di e Caminda di Cruz na Dakota. □

